

## याकूबए ओसरो चिथी

आव चिथी परमेस्वरए उमिनताव खासिद लिज्याव यहूदीरालाई येसुए ओभाइ याकूबए परींद ओरायो ज़। आल साचो युँ हुप्ट दान्या येनर रैःज्या। परमेस्वरए ल्योदा साचो उयुँ हुबो मिँए ओयाःए वाज्र माःक, उकुइए ब दोज्याव (याकूब १:२२-२५)। निताव मिँ जाँचरानी ब थंरिज्या (१:१२-१४), ओकपूतै माल्यो धर्म ब दोज्याव (१:२६-२७), मिँ रैःद ब मादोव (२:१-७), चाव येन ब दोज्याव (२:१४-२०), ओसेलाई ब जोगोइज्याव (३:१-१२), मानुवाताव पाँ माखिम्द परमेस्वरए उधूँल लिद (४:१-१०), गेप्रभु उहुन्या छ्यामलाई ब कींव ज़ नैज्याव (५:७-९)।

1डा, गेपरमेस्वर सोनो गेप्रभु येसु ख्रीसनी निसेवा दोज्याव याकूबए डाल्योनी जे चितराँ पुतराँ ताद लिज्याव इस्राएली बाह थरलाव परमेस्वरए उमिनत लिज्यावरालाई जेरो लिज्या।

दुखरानी थंरिउ तान्या

2अ डानै डामेर, भाँती भाँतिलाव दुखर जेदैक 'चाव ज़ लिज्या' लिद थरैच्यो, 3 काराव ल्यो ताकिन युँ हुप्न्यात जाँचर उहुकिन वाज्र थंरिउ युँ ताज्या। 4 निताव थंरिउ युँ दैन्याए जूनी नो दुखर उहुकिन घुहुज्याक। ननी ज़ जे परमेस्वरए ओपाँत थंरिउर, छिबोर, कान्त ज़ जेखत माल्योर तान्या जेले।

युँ सुहुप्ट पोंखारिन्या

5जो येन जेमासैए, होए उजूनी परमेस्वरलाई पोंखारिद निउ ताके। हो ताकिन ची प्राइँलाई उयुँ याल्द उयुँ माकैद याज्याव परमेस्वरए ओल ज़ पैन्या ले। 6 खाली नो मिँए, "जुनी ब याँवा ज़," लिद उयुँ सुहुप्ट ओपोखारिउक। उयुँ माहुप्ट पोंखारिज्याव मिँ ते बतासए आदानी होदा ओख्याज्याव समुन्द्र स्यासो ज़ ताज्या। 7 है जैद

निताव मिँए ते, “परमेस्वरनी डान्निउ भरी डादैया ज़,” है ओमालिदी ब ताए। <sup>8</sup> नोए उयुँ खर्क ज़ तोबो पोक माथंरिए।

### गरीब सोनो धनी

परमेस्वरए ओपाँत बाज्याव मिँ आव मानुवात कान्ल ज़ मागनिसिउ ज़िम्ज़ा उलिदी ब ‘परमेस्वरनी ते घेप्पाल गनिसिउ डालिज्या’ लिन्या ओसम्जिउक। <sup>10</sup> धनी मिँए फरी ‘डास लिज्याव भरी परमेस्वरनी ते काता ज़ माले’ है लिन्या ओसम्जिउक। नो धनी मिँ ते वास वैद उथँज्याव मिताव ज़ तान्या ले। <sup>11</sup> ख्योःव नमल निमी बनै येप येप राव बतासस उहुक छी भरी थँद वासराए यावैर ब गलिद याजोबन ज़ माज्या। हो मिताव ज़ मिँ ब धनी उलिदी ब ओल उसिक ओधन ब खेमज्या, उमिन ब माज्या।

### जाँचरानी थंरिन्या

<sup>12</sup>धो सहिउ दुखर सहिज्याव मिँ असिक दैव मिँ ज़। निताव जाँचरानी उथंरिकिन नोए परमेस्वरनिकाव अजम्बरी जुनी दैरिज्याव। परमेस्वरए ओल्योदा यायुँ थू जैज्यावरालाई नो जुनी यान्या याका डादाकिन ज़ नैद ओराएज्याव। <sup>13</sup> खाली सुवारालाई यायुँए बिप्यादा लाँवा लाँवा ओराजैकिन आव जाँच परमेस्वरनी हुव ज़ है तालिरक। यायुँए ज़ है याजैज्याव। परमेस्वरए उयुँ माचावदा खर्क ज़ माबाए, छुतरालाई ब माचावदा बान्या युँ जैद मारायो। <sup>14</sup> बुरू मिँर या यालोभए ज़ यायुँलाई माचावल पारैज्यार। <sup>15</sup> ननी ज़ यायुँलाव माचाव पाँए माचाव येन ब जर्मैज्याव। नकिन नो माचाव येन ओयोःवत सिन्या सजाल झाःव दोज्याव।

### चाव भरी परमेस्वरए ल्योनी ज़ हुज्या

<sup>16</sup>डायुँलाव डानैँ डामेँर, जे ताङ्गकिच्यो। <sup>17</sup> गेलाई जुरिद हुज्याव चाव सोनो छैँव भरी खर्क ज़ मातोसिज्याव चुम चुमोलाई पलाँव जैज्याव स्वर्गताव गेबाबु परमेस्वरए ल्योनी ज़ हुज्या।

18 ओरासिजैव भरिरानी गेलाई 'साःरोल डाताव सै मिताव घतारक' लिन्या उयुं ओतावए ज़ साचो ओपांनी ओल ओथोल जमैसिक्यो।

परमेस्वरए ओपां थैव ब ताके, दोव ब ताके

19 डायुंलाव डानैं डामेर, आव ब सैच्यो, चाव पां थैन्यात झाःसिद लिच्यो, पांन्यात तहस पाँच्यो, जेरिस हतपूत ताचोक। 20 काराव ल्यो ताकिन मिँए उरिसनी परमेस्वरए ओपैज्याव मिताव धर्मलाव येन खर्क ज़ मासयोःधुव। 21 है जैद जेसकाव लिज्याव कुबानी बानीर सोनो बलेन्या पाँ रासूद उघुरिउर ताद जेलाई बाँचैधुज्याव जेयुंलाव वासूसिउ परमेस्वरए ओपां चावस सपरीव ताके।

22 खाली जे परमेस्वरए ओपां थैज्यावर वाज़ माःक, दाज्यावर ब जैसिउ ताके, मानी जेक्याँलाई जे ज़ धोका यान्या जेले। 23 जोए परमेस्वरए ओपां थैद ओमादोकिन, नो मिँ धर्पनल अइज़ उचिऊसिउ मिताव लिज्या। 24 नो मिँ नल चिऊसिद ननी ओबाव प्राइँना 'डा इताव डाल्यो' लिन्या ब मेंःज्याव। 25 खाली जोए पापनी पलेज्याव ओखत माल्यो परमेस्वरए ओकानुनलाई बनै चावस चिऊद मामेंःद थैद ओदोकिन, ननी ज़ परमेस्वरए ओअसिक दैन्या ले।

साचो ओकपूतें माल्यो धर्म

26 जोए, "डा ते धर्मी ची," है लिज्या, खाली ओसेलाई ओमाजोगोइधुकिन, नो मिँ ओलनी ज़ झुकिज्या, सोनो ओधर्म ब अनाकलाव ज़ ताज्या। 27 गेबाबु परमेस्वरए ओडाक साचो ओकपूतें माल्यो धर्म इतावनी ज़ ताज्या — तुहुरा तुहुरीर सोनो राँदी मेमारालाई यादुखल चिऊन्या, सोनो आव मानुवाताव पापरानी अछतड लिद छैवस लिन्या लिज्या।

## 2

मिँ रँःद तादोच्यो

1अ डानैं डामेर, ज़गै मगैव गेप्रभु येसु ख्रीसए ओपाँत जेयुं हुबोर

जेतावए जे मिँ रँ:द तादोच्यो।<sup>2</sup> परमेस्वरए ओपोत जेदुप्सिक तोबो उकुइत सुने कुइची ल्यो सोनो ओक्वार ब बनै चाव चाव ल्यो उहुकिन, फरी तोबो ओक्वार थाकना बुरूमो गरीब उहुकिन,<sup>3</sup> जे नो चाव क्वा क्वाइसिद हुवलाई वाज, “तँत चुसिन्के,” है जेदोकिन, फरी नो माचाव क्वा क्वाइसिद हुवलाई, “नँ नक ज़ च्याँ:सिद लिन्के, की जाँ मेकसै लिन्के,” है जेदोकिन,<sup>4</sup> जे जेखाल नितव मिँ रँ:द जेदोज़्यावए, तँनी ज़ जेदोव रँ:के।

<sup>5</sup> डायुँलाव डानैँ डामेर, आव तामे:च्यो, परमेस्वरए ते ज्ञान मानुवाताव गरीबरालाई ज़ युँ हुपून्याल धनी थरैद यानैव। परमेस्वरए ल्योदा यायुँ जैज्यावरालाई ओराज्या यान्या य़ाका ओरायो ब नोरालाई ज़। <sup>6</sup> है जैद जे नितव गरीबरालाई सोन्या मा:क। जे ज़ जेसैँज्या, जेखिरी पसिद अदालतदा सेल्द लाँज्यावर धनीर ज़ ताज्यार सानी। <sup>7</sup> जे जेक्याँत लिज्याव खीसए चाव उमिन बले:द लंज्यावर ब नोर ज़ ताज्यार सानी।

परमेस्वरए ओराज्यालाव कानुन सयो:न्या

<sup>8</sup> जे धर्मसास्त्रलाव प्राइरानी ओचाहित ल्यो परमेस्वरए ओराज्यालाव कानुन जेसयो:किन नो ज़्यासो लिज्या। नो कानुन आव ज़ — जेक्याँलाई किताव जेसमारिज्या, छुतलाई ब हिताव ज़ समारिउ ताके। <sup>9</sup> खाली जे आव कानुन मादाद मिँ रँ:द जेदोकिन पाप दाद परमेस्वरए ओकानुननी जेखत ल्योर जेथंरिज्या। <sup>10</sup> जोए परमेस्वरए ओकानुन भरी माबिरैद ओदोदी ब फरी तोबो ओमासयो:धुकिन नो कानुन भरी ओपो:स ज़ ओमादोव मिताव ज़ थंरिके। <sup>11</sup> जे ज़ जेसैँज्या, अर्काए ओज्याए ल्योदा माबान्या कानुन सोनो मिँ मासै:न्या कानुन ब तोबोए ओया:नी ज़ हुके। है जैद जो अर्काए ओज्याए ल्योदा ओमाबादी ब मिँ ओसै:किन, नो मिँए

परमेस्वरए ओकानुन मासयोःद ओगल्ती ल्यो ज़ थ०रिज़्या। 12 जे तछा पापनी पलेऽ्याव परमेस्वरए ओकानुननी जेफाल्सिरिज़्या लिन्या याका दाद दाव ब ताके, पाँव ब ताके। 13 छुतलाई उयुँ मानाज़्याव मिँ ओललाई ब परमेस्वरए ओफालो छचाम उयुँ नान्या माले। फरी छुतलाई उयुँ नाज़्याव मिँ हो छचाम परमेस्वरए ओसजानी पुलुसन्या ले।

युँ हुपन्या सोनो येन दान्या

14डानै डामेर, जो मिँए ओयाःए वाज़ ‘परमेस्वरए ओपाँत डायुँ हुपज़्या’ है लिद येन ओमादोकिन, नोए ओपाँ अन्नाकलाव ज़ ताके। निताव युँ हुपन्यानी कै जैद ओबाँचिधुरिज़्याव? 15 जेस परमेस्वरए ओपाँत बाज़्याव तोबो मिँ ओक्वार ब माल्यो, ज़्यावए ब माथैज्याव उलिकिन, 16 जेनी जोए नोलाई ‘चावस बानी, नफू तसी ज़्याद मुडँवल स्याँनी’ लिद ओयाःए वाज़ है दाद चाहिज़्याव भरी काता ज़ ओमाएकिन, नो काता ची तायादा? 17 हो मिताव ज़ परमेस्वरए ल्योदा युँ हुपन्या ब याःए वाज़ ताकिन अन्नाकलाव ज़ ताज़्या। साचो युँ हुबो मिँनी ते ओयेन ब रैःज्या।

18खाली सुवाराए, “परमेस्वरए उमिनतावर ते ख्वार अइज़ यायुँ वाज़ हुपन्यार याताज़्याव ओल्यो, ख्वार बनै येन दान्यार याताज़्याव ओल्यो,” है लिज़्याखेरहो। डा नो है लिज़्यावराए जूनी है डालिज़्या, “हिताव ताकिन येन मादाद जेयुँ जेसुहुबो डालाई सतैघाँचिके। डा फरी जेलाई डायेननी ज़ डायुँ डसुहुबो सतैद डयाच्या।” 19 नँ, “परमेस्वर तोबो वाज़ लिज़्या,” लिन्याक पै नयुँ नसुहुपज़्याव ते चाव ज़। खाली नाःपै ते माचाव पुरूसराए ब भुम भुम गूद यायुँ सुहुपज़्यार। 20 खाली नँ निताव माचाहिउ पाँज्याव मिँ, येन मादाद युँ सुहुपन्या भरी अन्नाकलाव ज़ लिज़्या लिन्या खर्क

नसैरिज्ञयाव?

अब्राहामए उयुँ हुबोनी ज़ येन दोक्यो

21गेपुर्खा अब्राहामए परमेस्वरए है ओदोव मिताव ओज़ा इसहाकलाई थानत चरैःन्या उयुँ ओमाकैवए नो ओदोव ओयेननी ज़ परमेस्वरए ओड़ाक धर्मी थोरिके। 22 उयुँ उसुहुबो मिताव ज़ ओयेन ब दोक्यो, ओयेन ओदोवनी फरी उयुँ उसुहुबो ब सयोःक्यो। 23 ननी ज़ धर्मसास्त्रलाव सर्सिउ पाँ योके। नलाव सर्सिउ आव ज़, “अब्राहामए परमेस्वरलाई उयुँ उसुहुबोनी ज़ परमेस्वरए नोलाई धर्मी ज़ थरैक्यो।” है जैद अब्राहामलाई परमेस्वरए ओनैँ ज़ है मनी दोकेर। 24 ननी ज़ गेसैँज़या, युँ सुहुपून्यानी वाज़ माःक, युँ सुहुपूद येन ब दोकिन वाज़ मिँर परमेस्वरए ओड़ाक उयुँलाव मिताव थोरिज्ञयार। 25 हो मिताव ज़ धर्मसास्त्रलाव राहाब पातर्नी ब नो इस्राएलीराए यारापरींव देस जाँचिना हुवनिलाई चावस समारिद मोंद छुत येमनी उनिपरींवए नो मेंमा ब ओदोव येननी ज़ परमेस्वरए ओड़ाक धर्मी थोरिके। 26 किताव उस० माल्यो क्यौँ सिउ ताज़या, हिताव ज़ येन मादाद ओयाःए वाज़ ‘डायुँ हुपूज़या’ है लिज्ञयाव मिँ ब हिताव ज़ ताज़या।

### 3

सेलाई जोगोइन्या

1अ डानैँ डामेर, परमेस्वरए ओपाँ पैन्यात कोभा मिँ केर्घे ताजैसिच्यो। अर्कालाई है दाज़यावए नो येनत उबिरैकिन परमेस्वरए नोलाई उपुर्कावराकिन कर्रास फाल्रिज्ञयाव लिन्या जे ज़ जेसैँज़या। 2 गे प्राइँए कुधु पाँ बिरेद गेदोड़या। खाली जो मिँए ओसेलाई जोगोइद पाँज़या, हो वाज़ ओखत माल्यो पैधुन्याकाव ताज़या। निताव मिँए ओक्यौँ भरिलाई ब काबु

जैधुज्याव। 3 नाःल्दिउ घोरालाई ब काबु जैन्याए जूनी ओयाःल लगाम झाःद गेएकिन जोदा गेयुं लिज्या होदा ज़ गेलाँधुज्या। 4 घेपपा री जहाज चलैज्याव मिँए ब जती घ्योःव बतास उहुदी ब जहाजलाई दल्कैज्याव तकेज़ा दाबीए जोदा उयुं लिज्या होदा ज़ लाँज्याव। 5 हो मिताव ज़ गेक्याँताव तकेज़ा गेसेए ब 'अइ डाजैरिज्या, है डाजैरिज्या' लिद छे छे डम्सिउर पाँज्या।

तकेज़ा मेंःए उझिलिङ्गाए ब नाःल्घालु बनर चुयाप याख्याज्याव। 6 हो मिताव ज़ गेसे ब तोबो मेंः स्यासो ज़ लिज्या, आव गेक्याँताव भरिरानी बनै अपराधी लिज्या। नाःल्दिउ गेक्याँलाई ब नोए ज़ बलेज्याव। नर्गलाव मेंः रैद गेजुनीलाई ब हिपघासिज्याव।

7 प्राईँ किसिमलाव जै जन्तुर, नमताव भुज्यावर, नामलाव गोल्लज्यावर, रीलाव लिज्यावर, प्राईँलाई मिँराए ज़ याराउगुनैज्यार। 8 खाली आःपै सेलाई ते सुए ज़ माउगुनैधुव। नो बनै ओधास ल्यो खर्क ज़ चिम दाद मालिन्या छे छे डम्सिउ लिज्या। 9 नो सेए ज़ गेबाबु परमेस्वरए उमिन ब सघ्योःद गेएज्या, नो सेए ज़ परमेस्वरए उसुरूपनी जैसिउ मिँलाई सराप ब गेएज्या। 10 तोबो याःनी ज़ असिक ब पुलुसज्या, थलन्त्या ब पुलुसज्या। अ डानैँ डामेर, इताव ते माताव परिन्त्या। 11 तोबो रीमुलनी ज़ डमो री सोनो काव री उहुज्याव रो? 12 काता नेभारा सींत जैतून ओसैज्याव रो? सैँ जोम्परसैत नेभारा ओसैज्याव? हो मिताव ज़ काव रीमुलनी खर्क ज़ डमो री माहुए।

### परमेस्वरए ओयेन खिस्द मादान्या

13 जेनी सुवार परमेस्वरए ओपाँ सैन्यार जेलिकिन नोए मासघ्योःसिद तहस ओदोज्यावनी वाज़ सैन्या गराँन्या ओरैँःक। 14 फरी जो मिँए खिस्द स०द ओदोकिन नो मिँ सघ्योःसिद परमेस्वरए ओपाँलाई ब बलेज्याव। 15 नो खिसज्याव मिँए उयुं परमेस्वरए ल्योनी हुव

माःक, नोए उयुँ मानुवानी सोनो सैतानए ल्योनी हुव ची। 16 काराव ल्यो ताकिन जोक क्यॉलाई तान्या सोनो खिसून्या ताज़्या, होक माखैन्या सोनो इसिन्या वाज़ ताज़्या। 17 परमेस्वरनी हुज़्याव युँ ते छैव ब ताज़्या, सखैव ब दोज़्याव, उघुरिउ बोमो युँ ब जैघाव दोज़्याव, गराँव युँ ताद चाव येन दाव परीव दोज़्याव, ओकपूतें माल्यो, मिँ रँःद मादान्या जैव ब दोज़्याव। 18 परमेस्वरनिकाव युँ दैव मिँए ओपाँ बनै चाव धुर स्यासो ताज़्या। जोक वासूज़्याव होक ज़ प्राइँलाई सखैद परमेस्वरए उयुँलाव मिताव जैव दोज़्याव।

#### 4

क्यॉलाई तान्या वाज़ खिम्न्या माःक

1कै जैद जे जेखार्ल इसिन्या, जगरा दान्या उपुलुसूज़्याव? नो भरी जोत ब युँ मानैधुद क्यॉलाई तान्या वाज़ खिम्न्यानी ज़ ताज़्या। 2 लोभ दाद जेयुँए ओपैज़्यावलाई जेमादैकिन जेडालाव परिउ भरिलाई खेमो जेपैज़्या, सोनो जोत जेमी तूज़्या होत इसिद जगरा ब जेदोज़्या। नो जेपैज़्याव भरी परमेस्वरस जेत्तिकिन जेदैखेहो ज़। 3 खाली माचाव युँस क्यॉलाई तान्यानी वाज़ जेत्तिकिन ते परमेस्वरनी ब जेमादैए।

4ए निताव सतत मालिज़्याव मिँर, काता आव मानुवाताव पाँ खिमूज़्याव मिँर परमेस्वरकिन तँदा लिज़्यार लिन्या जेमासैए रो? जो आव मानुवाताव ताज़्याव पाँए ओनै जैसिज़्या, नो मिँ परमेस्वरनी तँदा ज़ ताज़्या। 5 गेजूनी धर्मसासूत्रलाव सर्सिउ पाँ अन्नाकलाव माले। नल, “गेयुँलाव बास दाज़्याव परमेस्वरए उपुरूसए ते “डाल्योदा वाज़ यायुँ थू याजैकिन ताखेहो” लिद उस० तरा चींज़्याव।” 6 खाली नो पुरूसए उयुँ गेल्योदा इन ज़ याल्ज़्या। है जैद धर्मसासूत्रल,

“स०द सघ्योःसिज़्यावरानी परमेस्वर तँदा ज़ लिज़्या,



सजिमसिज्जयावराए ल्योदा ते उयुँ गाल्ज्या।”  
 7 है जैद जे परमेस्वरए उधुँल लिद सैतानए ओपाँलाई भैःद  
 जेमाणकिन ओल ज़ धोंःद बान्या ले। 8 फरी परमेस्वरए  
 ओल्योकसै बाकिन ओल ब ल्योकसै हुज्या। जे पापीर, मादान्या  
 दाव परींज्याव जेकुइलाई फरी दाव ताएच्यो। नेयुँ दाज्यावर  
 जेयुँ छैव जैचिके, पाप दान्यादा जेझाःज्याव जेयुँ फरी नदा  
 ताझाःच्यो। 9 सोगो दाद जेयुँ ओघरक। मानुवाताव पाँत थाँतस  
 रेंद जेलिज्याव ब ओतोसिक। ल०द जेसासोत ब जेयुँ माचाव  
 ओदोवक। 10 परमेस्वरए ओझाक सजिमसिद फुलुप्सिकिन ओल  
 ज़ सोचोइद सघ्योःन्या ले।

नै मेंलाई सतेद पाँन्या माःक

11 डानैं डामेर, जे जेल सुलाई ज़ सतेद पाँन्या माःक। जोए नै मेंलाई  
 सतेद ओखत पलेःदिज्याव, निताव मिँए परमेस्वरए ओकानुनकिन  
 तँदा जैसिद ओपाँलाई ओखत ल्यो जैज्याव। निताव ओखत  
 ल्यो जैज्याव मिँए परमेस्वरए ओकानुन मादाद झन परमेस्वरए  
 ओकानुनलाई ओफाल्ज्याव मिताव ज़ रैःज्या। 12 कानुन जैद  
 कानुननी फाल्ज्याव ओल परमेस्वर वाज़ लिज्या। नोए बाँचैव  
 ब दोज्याव, खेमो ब दोज्याव। है जैद जे नै मेंलाई कै जैद ‘इताव  
 हिताव’ है दाद सतेन्या ओताज्याव?

सघ्योःसिद पाँज्याव मिँ

13 जेनी ख्वाराए अइ जेलिज्याखेहो, “आछिम ताव, पराःती ताव  
 तोबो सहरल बाद नल तबर्सवा लिद पसलर थाँद पैसार डाकमैया  
 ब,” है जेलिज्याखेहो। निताव मिँराए आव डापाँ थैचिके। 14 ‘पराःती  
 अइ डातारिज्या’ लिन्या जे जेमासैए। जे कोहो स्यासो वाज़  
 जेलिज्या। नो कोहो होक ज़ ताज्या, होक ज़ माज्या। 15 जे  
 बुरू, “परमेस्वरए उयुँ ओताकिन गो बाँचिद अइ गेजैरिज्या, है

गेजैरिज्ञ्या,” है ल्यो परिन्या। 16 है जेमालिकिन जे ज्ञ सघ्योःसिद ओर्घांत ज्ञ जेपाँव रैःज्ञ्या। निताव सघ्योःसिद पाँन्या बनै माचाव लिज्ञ्या। 17 है जैद जोए चाव येन दाव परिण लिन्या सैज्ञ्यावत ब मादोव, होलाई पाप लागिसूज्ञ्या।

## 5

अर्काए ओक्याँत धनी तावर

1ए धनी तावर, आव डापाँ थैचिके। जेक्याँत हरिज्ञ्याव छे छे डम्सिउ दुखए जूनी जेयुँ माचाव जैद घर्चिके। 2 जेधन भरी ब उपुव मिताव ज्ञ ताद ले, जेक्वा भरी ब ओनाँःव मिताव ज्ञ ताद ले। 3 जेसुन चाँदीर ब पीज्ञ्यासो मिताव ज्ञ ताद ले। नो पीज्ञ्यासो ज्ञ जेसाची ताद फाल्नुया छ्याम मेंःए माँःती जेक्याँलाई ज्ञान्या ले। है जैद नो जेदुपूज्ञ्याव धन भरी आछिमकावए जूनी माःक, फाल्नुया छ्यामकावए उजूनी ची। 4 नो जेएँःलाव येन दाज्ञ्याव बाहोर्यारालाई याःथन प्राई मायाद येन वाज्ञ दाव जेरापरीकिन नो जेमारायो भरी जेडैत ज्ञ तान्या ले। नो बाहोर्यार याकिज्ञ्याव माहान परमेस्वरए थैरिज्ञ्याव। 5 जे आव मानुवात जेयुँनी हुव भरी दाद थाँतस लिद पल्सिनुया छ्यामकावए उजूनी बनै जेसोसोइसिज्ञ्या। 6 झन जेकिन तँदा माजैसिद काता ज्ञ मापाँज्ञ्याव धर्मीलाई मनी खत लैद जेसैःके।

दुखर सहिद गेप्रभुलाई कीव ताके

7जे डानैँ डामेर, गेप्रभु फरी ओमाहुवा पै जेयुँ थू जैद कींद नैच्यो। एँःलाव येन दाज्ञ्यावए ब ओवासो धुरलाई ओमामीःवा पै कींद नैज्ञ्याव। सोनो ‘नम मावारिज्ञ्या’ लिद नमलाई ब उँध्याली उभ्याली चिऊव ज्ञ नैज्ञ्याव। 8 हिताव ज्ञ जे पाला ख्रीसलाई ओमाहुवा पै ‘जुनी ब हुया ज्ञ’ लिद जेयुँ सुहुपूद कींद नैचिके। ओल हुनुया तादाड माले, लापक ज्ञ लिज्ञ्या। 9 डानैँ डामेर, जे छुतए ओडैत

तागन्गनैच्यो। जे अर्काए ओगल्ती अन्नाकल ज़ पलेऽद जेएकिन नोकिन जे जेगल्ती झन ज़ रैःजूया। नो जेयेन फाल्नुया जेयामक ज़ च्याँःसिद ले।

10 डानैँ डामेर, परमेस्वरए उमिन हाइज़्याव अगमबत्काराए किताव दुखर सहिद थंरिद लिकेर, हिताव ज़ जे मनी थंरिद लिच्यो। 11 नो थंरिद लिज़्यावरालाई गे धन्याकावर ज़ है गेरादोज़्या। अय्यूबए मनी बनै धो सहिउ दुखर दैद उसहिउत परमेस्वरए हाः चाव ओजैव जे ज़ जेसैजूया। है जैद परमेस्वरए उयुँ ओनाजूयाव उयुँ ओयाल्जूयाव ननी ज़ रैःजूया।

आगल्या पाँ तापाँच्यो

12 डानैँ डामेर, प्राइँरानी घेप्पा पाँ आव ज़ — नाम नम अथबा जोराए मिनर तादी ब हाइद किर्या ताझाःच्यो। बुरू जेपाँक हैज़लाई हैज़ लिच्यो, माःकलाई माःक ज़ लिच्यो। आगल्या जेपाँकिन गल्ती थंरिन्या ओछ्यास लिजूया।

ओजोरो हुजूयावलाई पोंखारिद्यानुया

13 जेस सुवार दुखल यालिकिन नोए परमेस्वरलाई ओपोँखारिउक। फरी सुवार रेंवर यालिकिन नोए परमेस्वरए उमिनत भजन ओगैवक। 14 जेस सुवार याजोरो उहुकिन होए मन्दलीलाव सेररालाई ओराखुलोक। नो सेरराए ओजोरो हुवए ओडैत परमेस्वरए उमिननी मास थीद्याद पोंखारिद ओएरक। 15 परमेस्वरलाई युँ सुहुपद पोंखारिकिन ओजोरो हुजूयाव गरँनुया ले। ओजोरो हुवलाई ओल परमेस्वरए ज़ सोचोइजूयाव। फरी नो मिँए पाप ओदोव ताकिन, ओपाप ब क्याल्सिजूया। 16 सगराँसिनुयाए जूँनी जेदोव पाप जे जेल मामोंद भैःद जे जे पोंखारिसिच्यो। धर्मी मिँए परमेस्वरलाई ओपोँखारिउ पाँए बनै घ्योःव येन दोजूयाव।

17 एलिया ब गे स्यासो मिं ज़ ओल्यो। होए 'नम तावाक' लिद ध्यानस ओपोंखारिक आव नामल सोरिम छ मैना भरी नम वा ज़ मावाके। 18 फरी 'नम ओवाक' लिद ओपोंखारिक नम वाद आव नामल अनर बनै ज़ ताके।

पाप दाजूयावलाई सोवोल्न्या

19अ डानैं डामेरं, आव ब सैंच्यो, जेनी सुवार परमेस्वरए ओयेमनी ओल्द ओबाकिन जोए नोलाई सोवोल्द रैजूयाव, 20 होए नो मिंलाई नर्गनी सोवोल्द औरैव मिताव ज़ लिजूया। कुधु ओपाप ब कपूद ओयो मिताव ज़ लिजूया।

**साःरो बाचा**

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd